



Ika-Napulo'g Upat nga Dominggo sa
Kasarangang Panahon
Hulyo 6, 2014

RITO SA PAGESUGOD

P: Sa ngalan sa Amahan ug sa Anak ug sa Espiritu Santo.

K: *Amen.*

P: Ang Ginoo maanaa kaninyo.

K: *Maanaa usab kanimo.*

Ma-Dominggong Tamdanang Liturhikal alang sa Simbahan sa Kabus sa Diwa sa Bag-ong Ebanghelisasyon

Ang Simbahan sa Kabus, pinaagi sa Gagmayng Simbahanong Katilingban, salamat sa pagpuyo sa Espiritu sa atong kahiladman, makagawas lamang sa mga balaod sa unod kon makighiusa siya sa mga kabus ug mayukmok sa ilang pakigbisog alang sa bag-ong kalibutan nga gihimugso sa kasingkasing ni Jesus.

Atong palawomon ang atong kinaugalingong pagsabot sa atong Kristohanong identidad isip Simbahan, o Gagmayng Simbahanong Katilingban, pinaagi sa pagtutok sa pagka-Pari ni Jesus: siya ng labawng pari, nga nag-ula sa iyang kaugalingon mismo ngadto sa Diyos alang kanato. Sumusunod kitang tanan niining halawom ug unibersal nga pagkapari sa mga tumutoo. Para kanilang na-ordenahan, kining ilang pag-apil sa pagkapari ni Jesus nahimong mas hayag ubos sa Maalagarong Pagkapari ni Jesus. Hiniusa, ang mga na-ordenahan ug ang di-naordenahan mahimong maghahalad ug ang gihalad sa samang higayon usab alang sa bag-ong kalibutan nga pinakaduol sa hingpit nga katumanan sa Gingharian sa Diyos. Busa, pamalandongan ta ang kining giingon sa PKP-II:

“9. Isip Pari, Propeta, Hari

(57) Sa ato karong paghiling sa

kinabuhi, kamatayon ug pagkabanhaw ni Jesus, mahimong para kanato siya pari, propeta ug hari. Pari siya, apan hinoon dili sa linya ni Aaron. ‘... adunay kita’y banggiitang labawng pari ... , si Jesus, ang anak sa Diyos,’ gipili sa Diyos mismo. Ang iyang tibook kinabuhi usa ka halad ngadto sa Diyos.

Mao gani, sa iyang pag-anhi sa kalibutan, miingon si Jesus: sakripisyo ug halad wala nako tinguhaa, apan usa ka lawas imong giandam alang kanako; mga halad-sinunog ug mga sakripisyo alang sa sala wala nimo kahimut-i. Unya miingon ako, ‘Sumala sa akong gisulat na sa maong basahon mahitungod kanako, ania ako aron pagbuhat sa imong kabubut-on, O Diyos.

(58) Wala gayud niya bawia kadtong orihinal nga desisyon. Kanunayng nagabuhat sa unsa mang makapahimuot sa iyang Amahan, siya mao ang Balaan ug Usa ka Diyos nga wala kamansahi sa sala. Ang Iyang kamatayon, ang pinakataas nga sakripisyo alang sa kaluwasan sa kalibutan. Iyang gitugyan ang iyang kinabuhi nga walay tugbang alang sa iyang mga karnero, oo, alang sa mga sala sa tibook kalibutan. Sa katapusang panihapon iyang gihalad ang iyang kaugalingon pinaagi diha sa mga timaan isip usa ka sakripisyo nga nagsira sa bag-ong kasabutan sa iyang dugo. Kining si Jesus, pari ug biktima, maoy atong Manluluwas.” ■

Pasiuna ug Pag-abi-abi

Mga minahal kong mga igsoon:

Maayong pag-abot dinhi sa atong kasaulogan sa gugma ug kinabuhi sa Diyos nga gawasnon ug walay-tugbang niyang gipaambit kanato. Niining atong kasaulogan karon, atong pangayoon sa Espiritu Santo nga iya kitang tabangan nga mapuy-an nato ang pagkapari ni Jesukristo, atong Ginoo, sa hingpit pinaagi sa pagka-maghahalad ug hinalad usab dayon, alang sa atong silingan, alang sa yugto sa paghari sa Diyos.

Akto sa Paghinulsol

P: Mga igsoon, ato karong angkonon ang atong mga sala aron mahimo kitang takus nga magsaulog niining misterio sa gugma ug kaaghop sa Diyos.

P: Ginoong Jesus, ikaw ang gugma ug kaaghop. Ginoo, kaloy-i kami.

K: *Ginoo, kaloy-i kami.*

P: Kristo Jesus, ikaw ang kalooy ug hustisya. Kristo, kaloy-i kami.

K: *Kristo, kaloy-i kami.*

P: Ginoong Jesus, ikaw ang pasaylo ug ang pagpakig-uli. Ginoo, kaloy-i kami.

K: *Ginoo, kaloy-i kami.*

P: Kaloy-an unta kita sa Dios... ngadto sa kinabuhing walay katapusan.

K: *Amen.*

Himaya sa Diyos didto sa langit...

Kolekta

P: Mag-ampo kita: O Diyos, kinsa diha sa pagpaubos sa imong Anak gibayaw mo ang nahulog nga kalibutan, pun-a ang katawhan mo sa balaang kalipay, kay alang kanilang imong giluwag gikan sa pagka-ulipon sa sala, imo man usab gihatag ang kalipay nga walay katapusan. Pinaagi sa among Ginoong Jesukristo, imong Anak, nga buhi ug hari uban Kanimo diha sa kahiusahan sa Espiritu Santo,

Dios nga usa, hangtud sa kahangturan.

K: *Amen.*

LITURHIYA SA PULONG

Unang Pagbasa: Zac 9:9-10

L: Ang Pagbasa gikan ni Propeta Zacarias.

(Basahon gikan sa Kasulatan)

L: Ang Pulong sa Ginoo.

K: *Salamat sa Dios.*

Komentaryo sa Zac 9:9-10:

Sa dihang mipuli ang mga Griego, sa pamunuan ni Alexander ang Banggiitan, ang pagsakop sa Israel gikan sa kamot sa Persia kaniadtong tuig 333 sa wala pa ang panahong komun (BCE=Before the Common Era) – basaha sa Zac 9:13 – adunay nagduladula nga duha ka mga ideyolohiya mahitungod sa pagpaabot sa mesiyas. Ang usa mao ang mesianikong interbensyon nga nasyonalista, militante, armado ug mapasi-atabon sa kadaugan. Ang ikaduha mas hilom ug malangkubon, mapahiubsanon, maloloy-on ug nagpunting sa manluluwas isip usa ka ubos nga alagad. Ang usa ka dagang sa paghubad niini mao ang pagpalabi sa ikaduha kay sa nahauna, ilabi na gayud bahin sa Bag-ong Kasabutan nga naglarawan kang Jesus nga nagsakay sa usa ka asno ug nagguyod sa nating kabayo. Ang ika-duhang linya sa pagsabot nag-tan-aw sa tawhanong kasaysayan ug sa Diyosnong alternatibo: samtang nagpadayon ang gubat sa pagbatok sa mga kabus, anaa usab kanunay ang pagtawag sa kalinaw nga kinahanglang iapil: si Jesus nagsakay sa asno, ang kauban sa kabus sa iyang mabungahong buhat, uban sa nating kabayo, ang posibilidad sa armadong pakigbisog sa mga kabus sa higayon nga ang ilang pagpangita sa hustisya ug kalinaw pugngan sa mga nagharing hut-ong.

Salmo Responsoryo: Sal 145:1-2, 8-9, 10-11, 13-14

(Basahon gikan sa Kasulatan)

Komentaryo sa Sal 145:

Usa usab kini ka salmo akrostiko, o awit nga ang matag berso nagsugod sa mga titik sa alfabeto. Ang balaknong kainit magka-anam katas subay sa dagan sa gipanghisgutan gikan sa personal ngadto sa umaabot nga kaliwatan ngadto sa mga nahigugma sa Diyos ug, sa katapusan, ngadto sa tanang may kinabuhi. Ang panahon o dagan sa panahon usab ming-uyon sa nagkataas nga kainit sa pagdayeg: gikan sa inadlaw-adlaw hangtud sa walay katapusan! Ang hingtungdan sa pagdayeg mao ang Ginoo ug ang tanan niyang gibuhat: tiunay ang Ginoo, hinay masuko ug maloloy-on kaayo; ang iyang mga kusganong mga buhat nga nagtukod sa Gingharian nagabayaw sa mga kabus ug mga uyamot.

Ikaduhang Pagbasa: Rom 8:9, 11-13

L: Ang Pagbasa Gikan sa Sulat ni San Pablo ngadto sa mga Taga-Roma.

(Basahon gikan sa Kasulatan)

L: Ang Pulong sa Ginoo.

K: *Salamat sa Dios.*

Komentaryo sa Rom 8:9, 11-13:

Ang uyukan karon sa mensahe ni Pablo mao ang Espiritu Santo ug ang iyang papel sa atong kinabuhi. Kinsa man ang makaluwas kanato gikan sa kahimtang sa tumang pagkaulipon sa kamatayon? Si Kristo ug ang gasa sa Espiritu. Ang tawhanong unod wala na mag-inusara sa iyang pagpakigbisog batok sa tawhanong kahuyang ug kamatayon. Ang kauban karon sa katawhan sa maong pakigbisog ngilngig kaayo: ang Amahan nga nagpadala sa Anak, ang Anak nga nagtugyan sa iyang kinabuhi ug ang Espiritu nga maoy gasa sa Amahan

ug Anak! Sa pagpuyo sa Espiritu dinhi kanato, giangkong gilayon kita sa Amahan ug sa Anak. Wala na kita'y utang pa sa unod nga mao ang atong kahimtang sa kinabuhi. Hinonoo, tungod sa Espiritu aduna na kita'y gahum sa mata'g butang nga iya sa unod, ug mahimong bag-ohon nato ang mata'g pagkiling sa unod ngadto sa kamatayon ngari sa bag-ong kinabuhi, sa pakigbisog! Mahimo natong usbon ang kalibutan pinaagi sa iyang mga bili ug gambalay nga nagpaduol kanato sa kahingpitan sa Gingharian sa Diyos pinaagi sa atong pakigbisog!

Berso sa Aleluya:

T: **Aleluya, aleuya.** Bulahan ikaw, Amahan, Ginoosa langit ug yuta; imong gipadayag ngadto sa mga gagmayng binuhat ang mga misteryo sa gingharian!

T: **Aleluya, aleluya.**

Ebanghelyo: Mat 11:25-30

P: Ang Ginoo maanaa kaninyo.

K: *Maanaa usab kanimo.*

P: Ang Santos nga Ebanghelyo sumala ni San Mateo.

K: *Himayaon ikaw, O Ginoo.*

(Basahon gikan sa Kasulatan)

P: Ang Ebanghelyo sa Ginoo.

K: *Daygon Ikaw, O Kristo.*

Komentaryo sa Mat 11:25-30:

Ang sugilanon sa atong Ebanghelyo karon nahitabo human mahipadayag ni Jesus ang iyang identidad pinaagi sa pagtubag niya sa pangutana sa mga disipulo ni Juan Bautista (Mat 11:2-15). Nahingangha si Jesus bahin sa kinaiya sa kaliwatan sa iyang panahon: wala silay kahibangkaagan mahitungod sa kamatuoran (Mat 11:16-19); hinonoo, hilabihan ang subhestibismo maingon nga wala nay obhetibong katilingba-nong sukdanan aron mailhan ang husto gawas sa ilang mga tinguha ug hinanaling gusto. Ug ang kahingangha ni Jesus mas mitaas pa sa dihang iyang gisaway ang mga kasiyudaran nga maoy

sentro sa kulturanhon, ekonomikanhon ug politikanhong kadunot. Ang ilang kadunot ug baho mikaylap hangtud ngadto sa mga lalawigan ug mga hilit nga mga dapit. “Pagkapait nimo, Korasin! Kapait nimo, Betsaida! Ug ikaw, Kapernaum?” (Mat 11:21-24).

Busa gikan sa pinakaubos hangtud sa pinakataas kanila, walay bisan usa nga andam sa kamatuoran. Mao man gani nga ang pag-ampo sa pasalamat ni Jesus misaka taliwala sa katig-a sa kasingkasing niadtong angay untang modawat sa iyang pagka-siya, apan midumili man hinoon pagtoo! Inay, ang pagka-walay alamag sa mga kabus ug ang pagka-mapahiubsanon sa mga mayukmok maoy mga hiyas nga naghimo sa kabus nga abli sa mga mahigugmaong pagpahikurat ug katingalahang pag-apil sa Amahan. Apan ang mga adunahan, ang mga gamhanan ug ang mga may kahibalo, ah, ila lang ipatin-aw ang tanan nga daw walay bili, aron lamang pag-angkon sa ilang mga kabtangan ug pagpakitang maayo sila sa ilang kahakog!

Adunay duha ka mga kalihukan nga nahitabo dinhi nga dili gayud mahimong bulagon, nga mao ang kalihukan sa pagpadayag gikan sa langit, sa usa kabahin, ug ang kalihukan sa kalingkawasan dinhi sa kalibutan, sa laing bahin. Kining duha gihiusa diha sa pagkatawo ni Jesus.

Si Jesus, ang Magtutudlo, nagatudlo uban sa tawhanong kasingkasing. Ngadto sa mga kabus ug mga mayukmok iyang gikabilin ang pinakalawom nga misteryo sa pagtukod ug Gingharian nga gikan sa langit. Mao kini ang gipasabot sa pagkat-on gikan kaniya nga naghupot sa malumo ug mapahiubsanong kasingkasing: ang pakigbisog sa mga kabus ug mga mayukmok aron mahimong mas nindot ang atong mga kinabuhi puno sa kasakit ug kakuyaw

sa mga paglapas ug kamatayon, apan kini usab malipayon, makapahulayon, maloloy-on, mapasayloon ug makahingpit sa kahiladman. Tungod niining bag-ong pagtulun-an nga gikan sa langit nga mitubod pinaagi diha sa tawhanong kasingkasing ni Jesus, natawo ang bag-ong kalibutan!

**Ang Simbahan sa
Kabus, pinaagi sa
Gagmayng
Simbahanong
Katilingban, salamat sa
pagpuyo sa
Espiritu sa atong
Kahiladman,
makagawas lamang sa
mga balaod sa unod kon
makighiusa siya sa mga
kabus ug mayukmok sa
ilang pakigbisog alang
sa bag-ong kalibutan
nga gihimugso sa
kasingkasing ni
Jesus.**

Please help us continue publishing
this Missalette with your donation.

Any amount is appreciated
no matter how small.

Thank you!

Account Name:
Communication Foundation for Asia
Metrobank V-Mapa, Sta. Mesa,
Manila Branch:
SA# 3306-509-480
BDO Old Sta. Mesa Road, Manila Branch:
SA# 7090-042-836

Please fax deposit slip to 713-2736
We are located at # 4427 Old Sta. Mesa St.,
Sta. Mesa, Manila

Wali: Ang Simbahan sa Kabus, pinaagi sa Gagmayng Simbahanong Katilingban, salamat sa pagpuyo sa Espiritu sa atong kahaladman, makagawas lamang sa mga balaod sa unod kon makighiusa siya sa mga kabus ug mayukmok sa ilang pakigbisog alang sa bag-ong kalibutan nga gihimugso sa kasingkasing ni Jesus.

Sumadang Mensahe sa mga Pagbasa sa Dominggo	Ang Simbahan sa Kabus: Konkretong Hulagway sa kabus ug sa ilang kahimtang	Mga Puntos para sa Pamalandong/ Panawagan/ Hagit
<p>Ang Simbahan sa Kabus, pinaagi sa Gagmayng Simbahanong Katilingban, salamat sa pagpuyo sa Espiritu sa atong kahaladman, makagawas lamang sa mga balaod sa unod kon makighiusa siya sa mga kabus ug mayukmok sa ilang pakigbisog alang sa bag-ong kalibutan nga gihimugso sa kasingkasing ni Jesus.</p>	<p>Hinganli ang mga balaod sa unod, mga balaod sa kalibutan, nga inyong nasinati sa tagsa-tagsa ug isip GSK. Unsa man ang mga timailhan nga ang Espiritu Santo nagpuyo diha kaninyo ug sa inyong GSK nga nagpalingkawas kaninyo gikas sa mga balaod sa unod? Unsa mang mga konkretong lakang ang inyong nahimo aron makaapil kamo sa pakigbisog sa mga kabus alang sa bag-ong kalibutan?</p>	<p>Ang Espiritu nagpalingkawas sa Simbahan aron iyang matuman ang iyang parionong identidad pinaagi sa paghalad sa iyang kaugalingon, sa iyang mga sakop ug sa iyang mga kabtangan ngadto sa gugma ug solidaridad sa mga kabus nga sa ilang pakigbisog alang sa bag-ong kalibutan, naghahad na sa ilang kaugalingon alang sa Gingharian sa Diyos, agi ug pagsunod kang Jesus!</p>

Padayag sa Pagtoo

P: Nagatoo ako...

K: ...Sa Dios ang Amahan ang makagagahum sa tanan, Magbubuhay sa langit ug yuta; nagatoo ako kang Jesukristo, ang Iyang bugtong Anak, atong Ginoo. Gipanamkon Siya sa lalang sa Espiritu Santo, (*Moyukbo ang tanan*) ug natawo gikan ni Maria nga Ulay. Nag-antos Siya sa sugo ni Poncio Pilato, gilansang sa krus, namatay ug gilubong. Miadto Siya sa mga nangamatay. Sa ikatulong adlaw nabanhaw Siya. Misaka Siya sa langit ug nagalingkod sa too sa Dios, ang Amahan, ang makagagahum sa tanan. Mobalik Siya aron paghukom sa mga buhi ug sa mga minatay. Nagatoo usab ako sa Espiritu Santo, sa santos ug Katoliko nga Simbahan, sa pagpasaylo sa mga sala, sa pagkabanhaw sa lawas, ug sa kinabuhing walay katapusan. Amen.

Mga Katilingbanong Pag-ampo

P: Mga hinigugma kong mga igsoon, malipayon ug mapahiubsanon natong pangayoon sa atong Amahan nga iyang ipadayon ang pag-abli kanato alang sa gasa sa Espiritu nga nagpuyo sa atong mga kasingkasing ug nga matandog unta kita sa mga pagtultol sa mao gihapong Espiritu. Sa mata'g pag-ampo, kita motubag: Ginoo, pun-a ug tandoga kami sa imong Espiritu.

T: *Ginoo, pun-a ug tandoga kami sa imong Espiritu.*

L: Mag-ampo kita alang sa Simbahan: nga isip Simbahan sa Kabus sa tibook kalibutan, iya untang ipadayon ang pagtuman sa iyang parionong identidad, isip layko ug kleriko, pinaagi sa makanunayong paghimo sa liturhiya ug mga sakramento nga mga kasaulogan sa tinuod nga kinabuhi sa paghalad sa tanang mga tawo, ilabi na sa mga kabus, nga nanaghahad na sa ilang mga kaugalingon aron mahulma ang

makatarunganon ug mahigugmaong kalibutan. Mag-ampo kita sa Ginoo.

T: *Ginoo, pun-a ug tandoga kami sa imong Espiritu.*

L: Alang sa atong Santo Papa Francisco I, sa mga obispo, pari, diyakono, kanilang nanagpuyo sa kinabuhing konsagrado ug sa tanang gitugyanan sa pag-amoma ug pagdumala sa Simbahan isip Katawhan sa Dios: nga, dinasig sa Espiritu, mogawas gayud unta sila aron mosinati sa pinakalisud ug pinakabangis nga bahin sa kinabuhi aron molihuk sila alang sa kaluwasan ug kabag-ohan. Mag-ampo kita sa Ginoo.

T: *Ginoo, pun-a ug tandoga kami sa imong Espiritu.*

L: Alang sa mga lideres sa kalibutan ug sa tanang gitugyanan sa pangagamhanan ug pagdumala sa mga butang sa kalibutan: nga ila untang mapugngan ang walay renda nga kapitalismo ug isalikway ang espekulasyon sa pinansya ug espekulasyon sa mga baligya nga nakahatag ug kaparotan sa mga kabus, mga masakiton ug mga nagkinahanglan. Mag-ampo kita sa Ginoo.

T: *Ginoo, pun-a ug tandoga kami sa imong Espiritu.*

L: Alang kanatong tanan, mga lumulupyo sa kalibutan ug sakop sa kalangitan: nga magtinabangay unta kita sa pagkaplag ug ipuling bag-ong sistema sa ekonomiya sa kalibutan nga gipasukad sa dignidad sa atong pagkatawo, ug dili sa balaod sa merkado, sa prioridad sa kaayohan sa tanan, ug dili sa indibidwal ug elitistang kalamboan sa pipila lamang. Mag-ampo kita sa Ginoo.

T: *Ginoo, pun-a ug tandoga kami sa imong Espiritu.*

L: Alang sa atong mga minahal sa kinabuhi nga milalin na: nga diha sa kapasayloan sa ilang mga sala, maila na unta ang pahulay nga dayon diha

sa kasingkasing sa atong Ginoo ug Manluluwas, si Jesukristo. Mag-ampo kita sa Ginoo.

T: *Ginoo, pun-a ug tandoga kami sa imong Espiritu.*

L: Alang sa atong mga espesyal nga mga tinguha, sa kahilom sa atong tagsa-tagsa ka kasing-kasing, (*mohilum kadiyot*) Mag-ampo kita sa Ginoo.

T: *Ginoo, pun-a ug tandoga kami sa imong Espiritu.*

P: Ginoong Diyos, mao kini ang mga pag-ampo nga among gipadangat kanimo karon. Nagahangyo kami kanimo nga ihatag nimo kini kanamo pinaagi sa paghimo kanamong igmat sa mga lihok sa Espiritu nga ania kanamo, nga anaa sa among mga silingan, sa among katilingban, sa among kalibutan ug nga anaa usab sa tanang mga binuhat. Kini among gipangayo pinaagi ni Kristo atong Ginoo.

T: Amen.

LITURHIYA SA EUKARISTIYA **Paghalad sa mga Gasa**

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang pan nga abut sa yuta ug ginama sa kamot sa mga tawo. Mahimo kini nga kalan-on sa kinabuhi alang kanamo.

K: Daygon ang Dios hangtod sa kahangturan.

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang bino nga abut sa yuta ug ginama sa kamot sa mga tawo. Mahimo kini nga ilimnon nga espirituhanon alang kanamo.

K: Daygon ang Dios hangtod sa kahangturan.

P: Mga igsoon, pag-ampo kamo, aron ang ako ug ang inyong sakripisyo dawaton unta sa Dios nga

Amahan, makagagahom sa tanan.
K: Dawaton unta sa Ginoo ang sakripisyo gikan sa imong mga kamot; alang sa pagdayeg ug paghimaya sa iyang ngalan, alang usab sa atong kapuslanan ug sa tibuok niyang santos nga Simbahan.

Pag-ampo Alang sa Mga Halad

P: Hinaut nga kining halad nga gihimo alang sa imong ngalan makapahinlo unta kanamo, O Ginoo, ug sa inadlaw-adlaw mas makapahisuod sa among gawi nganha sa kinabuhi sa langit. Pinaagi ni Kristo among Ginoo.

K: Amen.

Prepasyo

P: Ang Ginoo maanaa kaninyo.

K: Maanaa usab kanimo.

P: Ibayaw ang inyong mga kasingkasing.

K: Amo nang gibayaw ngadto sa Ginoo.

P: Magpasalamat kita sa Ginoong atong Dios.

K: Angay ug matarong.

P: Angay ug matarung gayud, sibo ug makaluwas, kanunay ug sa tanang dapit nga magpasalamat kami kanimo, Ginoo, santos nga Amahan, labawng makagagahom ug walay-kinutubang Diyos.

Kay imong gihigugma sa tuman ang kalibutan ug sa imong kalooy gipadala mo kanamo ang Manluluwas, nga magpuyo sama kanamo sa tanang paagi gawas lamang sa sala, aron imong higugmaon dinhi kanamo ang imong gihigugma diha sa imong Anak, pinaagi sa kansang pagkamasinugtanon nahipauli kami ngadto niadtong mga gasa nga gikan kanimo, nga, sa among pagpakasala among nawagtang diha sa among pagkamasupakon.

Ug busa, Ginoo, uban sa tanang mga Anghel ug mga Santos, kami usab nagapasalamat kanimo, ug sa paghimaya, nagasinggit sa walay hunong nga pag-ingon:

Santos

K: Santos, Santos, Santos nga Ginoo, Dios sa kagahaman.

Puno ang langit ug yuta sa imong himaya. Osana sa kahitas-an. Dayegon ang nagaanhi sa ngalan sa Ginoo. Osana sa kahitas-an.

Pag-ampo sa Eukaristiya

(Human sa konsagrasyon, ang aklamasyon:)

P: Kini ang misteryo sa pagtoo.

K: Among gisangyaw ang imong Kamatayon, O Ginoo, ug among gipadayag ang imong Pagkabanhaw hangtud sa imong pagbalik pag-usab.

(Sa pagtapos sa Pag-ampong Eukaristiko, ang pari moingon:)

P: Pinaagi kaniya, uban kaniya ug diha kaniya, gihatag nganha kanimo makagagahom nga Amahan, diha sa kahiusa sa Espiritu Santo ang tanang dungog ug himaya hangtod sa kahangturan.

K: Amen.

Rito sa Pangalawat

P: Karon mag-ampo kita sa Amahan, atong gamiton ang mga pulong nga gitudlo kanato sa atong Manunubos.

K: Amahan namo, nga anaa sa mga langit, pagdayegon ang imong ngalan, umabot kanamo ang imong ginharian, matuman ang imong pagbuot dinhi sa yuta maingon sa langit. Ang kalan-on namo sa matag adlaw, ihatag kanamo karong adlaw ug pasayloa kami sa among mga sala, ingon nga nagapasaylo

kami sa mga nakasala kanamo, ug ayaw itugot nga mahulog kami sa panulay hinonoa luwasa kami sa dautan.

P: Mangayo kami kanimo, Ginoo, nga imo kaming luwason sa tanang dautan. Hatagi kami sa kalinaw niining panahona, aron, tinabangan sa imong kalooy, mahalikay kami kanunay sa sala ug mahilayo sa tanang kasamok, samtang nagapaabot kami nga malaumon sa pagbalik ni JesuKristo, among manunubos.

K: Kay imo man ang gingharian/ ug ang gahom ug ang himaya/ hangtod sa kahangturan.

P: Ginoong JesuCristo, nag-ingon ka sa imong mga Apostoles, “Ang kalinaw ibilin ko kaninyo, ang akong kalinaw ihatag ko kaninyo.” Ayaw tan-awa ang among mga sala, kondili ang pagsalig sa imong Simbahan ug sibo sa imong kabubut-on hatagi kami sa imong kalinaw ug kahiusa, Ikaw nga buhi ug hari hangtod sa kahangturan.

K: Amen.

P: Ang kalinaw sa Ginoo sa kanunay maanaa kaninyo.

K: Maanaa usab kanimo.

P: Ipakita ta ang atong panag-inigsoonay.

Kordero sa Dios

K: Kordero sa Dios nga nagawatang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, hatagi kami sa kalinaw.

Pangalawat

P: Kini mao ang Kordero sa Dios nga nagawagtang sa mga sala sa kalibutan. Bulahan ang gidapit alang sa panihapon sa Ginoo.

K: Ginoo, dili ako angay nga mokalawat kanimo, apan ipamulong lamang ug mamaayo ako.

Pag-ampo Human sa Pangalawat

P: Mag-ampo kita: Ihatag kanamo, O Ginoo, nga, human kami mapuno pag-usab pinaagi nianang matahom nga mga gasa, maangkon unta namo ang ganti sa kaluwasan ug dili unta kami mohunong sa pagdayeg kanimo. Pinaagi ni Kristo among Ginoo.

K: Amen.

Katapusang Panalangin:

P: Ang Ginoo maanaa kaninyo.

K: Maanaa usab kanimo.

P: Moduko kita ug atong dawaton ang bendisyon sa Ginoo: Hinaut nga maglipay unta nga hiniusa ang imong banay kanunay, O Diyos, tungod sa mga misteryo sa kaluwasan nga bag-o ra nilang gisaulog, ug ihatag sa iyang mga sakop ang pagkamalungtaron nga makabot ang mga bunga nga nagadagayday gikan kanila.

K: Amen.

P: Ug ang mga panalangin sa labawng makagagahum nga Dios, ang + Amahan ug Anak ug ang Espiritu Santo, mokunsad unta diha kaninyo ug magpabilin diha kaninyo kanunay.

K: Amen.

Pagpanglakaw

P: Panglakaw kamo sa kalinaw, ug pagahimayaa ang Ginoo pinaagi sa inyong kinabuhi..

K: Salamat sa Dios. ■

Ubani si Fr. Ben Alforque, MSC sa Missionaries of the Sacred Heart sa iyang **GOSPEL BREAK**, hamubo apan makalingaw nga video mahitungad sa Ebanghelyo karong Dominggo. Bisitaha ang gospelbreak.wordpress.com. o pinagi sa inyong smartphone o tablet i-swipe kini nga QR code.

